

## المُستسحرة



من محطة سعد زغلول استقلتُ المترو المتجه إلى المرج.. جلست بجوار سيدة وقورة تعدت الستين عامًا بقليل. في المقعد المقابل لي جلست فتاة غير متعلمة في نهاية العقد الثاني من عمرها، حسنة النية، إلى حد أنها تفسى سربيتها إلى من ترتاح له.

وبجوارها تجلس امرأة متعلمة، خمسينية حسنة المظهر، مُفوّهة إلى حد بعيد، تبدو لمن يراها دون أن يسمعها أنها أجنبية؛ بسبب لون شعرها الأصفر، وعينها الزرقاوين. ونظرًا لضيق المكان؛ كنتُ مُجبرًا على سماع ما تقولانه، فبدأت العشرينية حديثها مع الخمسينية:

- شوفي يا ستي، بقى الحاجة أم جوزي مُصرة تنام معنا في غرفة نومنا، يعني أنا وجوزي على السرير، وهي وبنتي الصغيرة على الكنبه، على الرغم من أن شقتنا واسعة و«برحة» وفيها غرفة ثانية غير غرفة نومنا، لكن تقولي إيه؟! وتكمل العشرينية بسداجة:

- وأنا بصراحة مش قادرة أتكلم معاها يا اختي. خايفة من غضب الرجل بتاعي، أحسن ده ابن أمه ويخاف على زعلها مووووووت.

في بداية حديثهما ظننت أنهما صديقتان، لكن بعد أن وجهت الخمسينية سؤالها للعشرينية عن عمر وطريقة زواجهما، اكتشفت أن علاقتهما لا تتعدى الدقائق.

العشرينية تواصل حديثها بعد أن مصممت شفيتها:

- إخواني الرجالة - الله يسامحهم بقى - جوزوني لصاحبهم، اللي هو جوزي، وأنا كان عمري عشرين سنة، وهو كان عنده 30 سنة يا اختي، يعنى الفرق بيني وبينه 10 سنين، جاتني نيلة في حظى اللي زي الهباب، لكن اعمل إيه يعني؟ «ضل راجل يا اختي ولا ضل حيطه» زي ما يقولوا، وعموما برضه كل شيء نصيب بقى.

تسألها الخمسينية:

- هي أمك عايشة حببتي؟ لا مؤاخذه في السؤال.

- بصراحة يا اختي، أمي ماتت من زمان، وما كنتش لاقية اللي ينصحنى ويوعيني بمقالب الحريم وحركاتهم الغدارة، لكن على أي حال عاوزة اقول لك إن الحاجة أم جوزي دي متسلطة وسليطة اللسان، علشان كده الكل بيكرها جداً، خصوصاً اخوات جوزها وجيرانها وقرايبها.. وبصراحة كده هم عندهم حق؛ لأن لسانها متبرّي منها.

تصمت الفتاة المسكينة برهة لتلتقط أنفاسها، وبصوت خافت لا يسمعه إلا من يجلس على مقربة منها تقول لمحدثتها:

- لما اتجوزت اتعلقت بجوزي قوي، زي أي زوجة بتحب زوجها، لكن الحب دايمًا يا اختي محتاج لتضحيات، وأولها إني اكسب رضا حماي.. أم جوزي رغم إن الكل كان بيحذّرني منها.

وقبل أن تواصل المسكينة شكوتها من أم زوجها، قالت لها محدثتها المتعلمة:

- «الحماوات» دول يا اختي بعيد عنك عاوزين الحرق بالنار. ده كويس قوي انك صابرة عليها بحسب ما انت بتقولي، ومع ذلك عاوزة انصحك نصيحة لوجه الله.

- قولي يا اختي مستنية إيه الله يرضي عليك؟؟

- عاوزاك تزوريني في مكتبي بكرة الساعة 11 صباحًا أكون رُقت شوية من الشغل،

وبعدين أتصل لك بعم «عباس»، الساعي بتاعي علشان يُقعد معانا شوية، وتشرحي له حكايته، وهو هيعمل لك «عمل» لحمايتك يخليها تحل عنك طول العمر.

الفتاة تسأل باستغراب:

- هو حضرتك بتشتغلي إيه يا ستي؟

- أنا وكيلة مدرسة الـ «.....»، وها هو كارتى حبيتي فيه عنواني ورقم موبايلي، وهاستأذنك بقي؛ لأنني نازلة محطة سرايا القبة.

ولأن حديث هذه المثقفة كان مستفزاً بعض الشيء، فأبدت الستينية التي كانت تجلس بجوارى اعتراضها بصوت مرتفع ووجه ممتعض على أسلوب المثقفة، وقالت بعد أن مصمصت شفيتها:

- صحيح «كذب المنجمون ولو صدقوا».

فما كان مني إلا أن نصحت الفتاة المسكينة بنسيان كل ما سمعته من محدثتها الخمسينية عن السحر والشعوذة.. وأكدت لها أن مثل هذه الأفكار والصدقات والسحر لا فائدة منها، بل قد تعجل من خراب البيوت، وأن أفضل علاج لمشكلتها هو الصبر على المكاره، ومعاملة حماها كأنها والدتها بالضبط.

وفي أثناء حديثي مع الفتاة؛ رجوتها قبل أن أنزل محطتي (عين شمس) ألا تُفشي أسرار بيتها لأحدٍ مهما كان، فوعدتني أن تعمل بوصيتي، وأنها ستسعى مديرة المدرسة، ولن تذهب إليها، وستستمر في معاملتها الطيبة لحماها وكأنها والدتها وأكثر.. انتهى.

